

拜經堂文集

臧拜經別傳

揚州阮

元撰

拜經姓臧名庸字西成又字拜經本名鏞堂武進縣人父繼

宏業實康熙間有與閻百詩同時老儒王琳林先生名琳者拜

經之高祖也乾隆五十四年餘姚盧學士文治主常州書院

拜經往受經學抱玉林先生所著經義雜記質于學士學士

驚異之于校經典釋文中多引其說五十八年在蘇州從嘉

定錢少詹大昕青浦王侍郎和金壇段縣令玉裁講學術錢

公玉公薦拜經于湖廣總督畢公沅授其孫蘭慶經嘉慶元

年歸丁父艱二年元督浙江學政延拜經至西湖助輯經籍

纂詁成拜經至廣東南海縣校刊于板而臧氏經義雜記諸

書亦以是時刊成之五年元巡撫浙江新開詒經精舍于西湖復延拜經至精舍補訂纂詁拔勘注疏七年歸常州九年入京應順天甲子鄉試王伯申侍講引之桂香東侍講芳皆引重之桂侍講命其弟桂葛從之學秋試房考吳美存編修其弟薦其文主司抑之十一年南歸過揚州伊墨卿太守東綬延修廣陵圖經十二年復應元招至杭州讀書于北關署中十四年歸里病十五年復應順天庚午鄉試不中式吳編修延之修中州文獻書十六年復病七月卒于吳氏館年四十有五拜經沉默敦重天性孝友遵父命續其高祖將絕之學修身著書並見于世可不謂孝乎其弟禮堂孝子也以毀

瘠卒拜經哀之乞朱文正公諸名儒之詩文以表章之可不謂
友乎其為學振據經傳剖析精微德清許周生兵部宗彥謂其
好學深造如皇侃熊安生當求之唐以上也所著之書擬經義
雜記為拜經日記八卷高郵王懷祖先生念孫亟稱之用筆圍
識其精確不磨者十之六七其叙孟子年譜辨齊宣王湣王之
訛閩縣陳恭甫編修壽祺歎為絕識又著拜經堂文集四卷月
令雜說一卷樂記二十三篇注一卷孝經考異一卷臧氏文獻
考六卷又其生平考輯古義甚勤故輯古之書甚多于夏易傳
一卷以予夏傳為漢韓嬰所撰非卜子夏惟宋釋文正義集解
古易音訓大衍議五家不取宋以後說詩考異四卷大旨如王

伯厚但逐條必自考輯絕不依循王本韓詩遺說二卷訂謬一卷顧千里廣所以為輯韓詩者衆矣此為最精盧植禮記解詁一卷爾雅古注三卷說文舊音考三卷蔡邕月令章句二卷王肅禮記注一卷聖證論一卷帝王世紀一卷尸子一卷賈唐國語注二卷校鄭康成易注二卷蕭該漢書音義二卷皆詳過于元初因竇應劉端臨台拱獲交拜經十年之間于我乎館者為多卒之後元寓其所著書為副本以原本還其家叙玉林先生入儒林傳中而以拜經附焉顧儒林為

國史文體宜簡乃復述其未盡者為別傳以告後之學人且致其哀恤云爾

亡友臧君誄

長洲宋翔鳳撰

武進臧君効於京師余方遊冀州逾月知耗念自交契星回歷
七君以學問益我以手足愛我非尋常之相與能不痛哉今夏
四月君方病癒余往問之當在牀第編校未休固出少時所校
月令樂記二篇屬余審視余以二篇之意勸之曰足下抱病而
好學不輟或者朝聞之意乎然月令順陰陽候天氣樂記言合
生氣之和故吸新吐故陰陽之藏也進退步趨剛柔之節也養
生者通儒者之要道非道家之曲說足下誠銳精覃思亦宜休
息隨時養其氣所以舉萬事存其身所以集令名君得余書時
已沉困答以難癒遂以嘉慶十六年七月癸卯卒於京師之逆

旅昔歲乙丑余往貴州以書別君君復書曰努力此別誠恐骨
肉委同艸露身後之文則以相托雖余之譎陋得交於君而素
不善文即作之亦何益損然君之手札七年以來猶在囊篋念
其相知適益余悲又安得不為君誄乎君名庸字西成原名鏞
堂以縣學生為國子監生年四十五其友長洲宋翔鳳為之誄
曰象緯在天江河在地人思不滅通有名字吁嗟吾友弱年勵
志手把篇策迹在寰肆性命古文糞土時議當其一得即有獨
至窮原得根柢同數異彼冥行索塗墮埴名動鄉曲學求大師
盧君講授高足相隨嚮校苑揚雄識奇君從脩定見跋不疵

繫余伯舅

蔭孫先生

絕學是追說字解經非世所知君之得力往往

在茲著作初就矯矯冠時尚書家學五十六篇思飢閉門心孤
力專伯叔手寫遺經速傳北海論語散如秋煙拓遺舊缺細別
精擘世之善本惟此一編字無亥豕書積丹鉛烏呼軀積竟盡
君年拜經日記過從頻讀聲轉注發蒙起覆宿儒首肯後學
心服充君志趣心力耳目然疑皆定往詁可復君之功勛在彼
卷軸君之地位躒孔凌陸沾溉人間充棟連屋中丞切切阮中丞
字詒經鄧太傅休休朱大傅歎其遺珠難驚白鵲瓦礫瑾瑜感士
不遇困於庸夫我有千載彼有頌史何必戚然遂悲窮途況今
大暮知陋一隅徒有故人腸斷形枯索交斯世相見稍晚君方
失弟大自銷損骨肉沉摯友道惘歎接遇俗流通訝偃蹇語言

外吃精神內捷性情所到推微及遠東脩至薄族部分散孰云
織霽寒士所短君有婦子方阻朔南魄散京國魂反江潭鴻儒
易失議論誰堪著作千古同心兩三涼颺已至寒雨相兼一鐙
閒館和墨書練曰言與行憾無芥織清風自今留為後談烏呼
哀哉

拜經堂文集序

武進有玉林臧先生者通經學古著書甚富

在東在東承其家學屏去俗好不屑蹈常襲故以合於時而獨
與其弟禮潛心為漢儒之學禮歿在東泣然心傷而余為文傳
之逾數年在東來京為今侍郎吳君烜纂中州文獻考余方約
其歸江南同修無錫金匱縣志而在東亦尋沒可悲也學者去
聖既遠百家衆說紛然具陳荀擇焉不精則說經而經愈亡近
世承學之士多宗漢學往往目未覩程朱之書厭薄宋儒指摘
其瑕疵以相毀謗當亦漢儒之所不與也在東之學師餘姚盧
紹弓先生因主張許叔重鄭康成諸儒而其與阮侍郎雲臺書

云程朱於聖門躬行之學為近是其言於宋儒不為無見余官
京師在東僭其鄉人惲子居集余邸其議論有合有不合而要
以古人為歸蓋子居為鄭清如之甥而在東嘗學於清如又皆
與張臯文為友殆其師友之授受切劘有相類者猶憶紹弓先
生老居杭州余嘗與往還無何出遊阻之不獲而先生竟沒於
毘陵身後寥落生平所手定古本書及其著作皆鬻於他氏為
之慨然今在東歿而其子相持拜經堂文集乞余序余故序其
文而及之時嘉慶二十年仲春無錫秦瀛序

昔昌黎韓氏有言求觀聖人之道必自孟子始豈不以孟子之
書本於道性善而正人心人之所以為人心與性而已六經者

聖人所以治人之心性舉而措之事業以為天下國家者也然
而訓詁不明則經之旨或晦焉故漢人之說經其有功于經也
甚著近世之學者爭言經學而好宗漢人其所師承皆有依據
吾友臧君在東其一也在東少與余善嘗命其弟禮從余遊禮
固以孝友著禮卒而復以命其子相相遊吾門甫二年而在東
沒相克成先志輯其父拜經堂遺文欲梓之以行遠而問序于
余余讀其文說經者居十之七八其訓詁之精考訂之確于漢
人之學深焉余性固陋又多疾不能博覽詳考顧少讀韓氏之
文又讀程朱書而善之以為得六經之義為多而于漢人之學
則雖知好之而非性之所近以序在東之文能勿慚乎獨計在

東生平里居之日少不克過從講習以求治經之源委而其弟
若子不使之就學他氏而獨以命余則于余殆非無意者故嘗
以謂相先治漢學以通其訓詁繼治宋學以究其義蘊尤必明
乎聖人所以作經之旨而于孔孟程朱之道同條共貫以善反
之身始可以進于儒者雖與世異趨毋悔焉在東可作不識以
吾言為然耶否耶嘉慶二十有二年九月朔日同里吳士樸序

拜經堂文集

目

卷第一

克己復禮解

仍舊貫解

孟子言伯夷論

夫死適人及出妻論

為妾服總議并釋

昆弟兄弟釋異

弟婦釋

魯惠公夫人子氏考

五岳釋

頌釋

卷第二

子夏易傳序

刻呂氏古易音訓序

刻詩經小學錄序

題蜀石經毛詩考證

刻蔡氏月令章句序

題夏小正全書目錄

書大學考異後

阮芸臺侍講大學格物說跋

錄爾雅漢注序

重刊宋本爾雅後

校宋槧板爾雅疏書後

書吳元恭本爾雅後

與段若膺論校爾雅書

小爾雅徵文

刻通俗文序

刻漢書音義序

錄華嚴經音文序

刻華嚴經音文序

錄唐釋_基能_基輔行記序

周易注疏按纂序

尚書注疏按纂序

毛詩注疏按纂序

書宋槧左傳不全本後

按影宋經典釋文書後

書左氏音義之六按本後

書毛本州木蟲魚疏後

列女傳補注序

書劉端臨先生遺書目錄後

跋經義雜記叙錄後

經籍纂詁後序

纂十三經集解凡例

四庫全書通俗文字跋

卷第三

上王德甫少司寇書

上王鳳喈光祿書

與江叔雲處士書

荅翁覃溪先生毛詩下武解

上侍讀學士盧召弓言齋論書

上侍讀學士盧召弓書

又

荅洪稚存太史書

上錢曉徵少詹書

又

又

謝錢曉徵少詹書

與段若膺明府書

與段若膺明府論說文快字錄字書

答錢曉徵少唐書

答陳恭甫編修論冠昏辭韻書

再答陳恭甫編修論韻書

與汪漢郊書

與莊葆琛明府書

答張伯雅書

與阮芸臺侍講論古韻書

與王懷祖觀察論校小學鈎沈書

與王伯申學士論校小學鈎沈書

與孫淵如觀察書

與孫淵如觀察論按管子書

與却蘭舉論按山海經書

與陳扶雅論大典本易林書

上畢繼衡制府書

上蔣祭酒書

與秦小岷少司寇書

答秦小岷少司寇書

答秦小岷司寇論韓昌黎書

答翁卓溪鴻臚卿書

與葉保堂書

與趙味辛舍人書

與顧子明書

與丁道久書

與姚姬傳郎中書

與王懷祖觀察書

上阮芸臺侍講書

又

與孫香泉書

與王伯申學士書

荅陳恭甫太史書

與陳雪香少司空書

卷第四

漢太尉南閣祭酒考

先師漢大司農北海鄭公紳坐記

題凌次仲教授校禮圖

跋宋虞廷會試卷後

昌字子美金字子純說

嚴景商^高字伯修說

宋學均字師鄭說

漁隱小園文飲記

雙桂小園記

題江井叔請書圖

題林仲雲望雲圖

題燕竹居圖

題孫蓮水詩抄

題汪孝嬰北湖訪焦君圖

送姚文溪大令還濟南序

別鈕非石序

別郭頻伽序

書張子厚訂頑後

書銀河棹校本後

跋長興臧氏宗譜

跋桑閑居士傳

刻庚午落卷跋

丁小雅教授六十序

孫太恭人六十序

卷第五

禮部侍郎莊公小傳

皇清日講官起居注前翰林院侍講學士盧先生行狀

禮部儀制司員外郎汪君行狀

荅吳玉松御史論汪禮部行狀書

皇例贈文林郎府學增廣生員蘇景程先生行狀

漢陽葉先生廬墓記

亡弟和貴割股記

與宋芷溪太史論刻愛日居遺文書

謝蔡生甫學士書

跋汪員外題孝節遺書後

焦氏世德記

題嚴忍公小象并戒子書

題孫葆年中丞遺像

讀淇縣典史汪府君行述

蕭山汪氏兩節母事略

霜哺遺音書後

節孝項母葉安人小傳

節孝熊母吳孺人事實

廣陵韓氏事略

桑梓潛德錄列女傳稿

祭王西林文

克己復禮解 戊辰仲冬

拜經堂文集第一

左氏傳昭十二年楚子次於乾谿右尹子革讀祈招之詩王揖而入饋不食寢不寐數日不能自克以及於難杜注克勝也仲尼曰古也有志克己復禮仁也信善哉楚靈王若能如是豈其辱於乾谿正義曰劉炫云克訓勝也已謂身也有嗜慾當以禮義齊之嗜慾與禮義交戰使禮義勝其嗜慾身得歸復於禮如是乃為仁也復反也 論語顏淵問仁子曰克己復禮為仁集解馬融曰克己約身也孔安國曰復反也身能反禮則為仁矣梁皇侃義疏云言若能自約儉己身返反於禮之中則為仁也於時為奢泰過禮故云禮也范甯云克責也復禮謂責克己失

禮非仁者則不能責己復禮故能自責己復則為仁矣

庸按左氏克己復禮仁也即論語克己復禮為仁古志本有是語孔子嘗稱之左氏引以論楚子論語引以答顏淵注疏家各望文生義爾雅釋詁克勝也又勝克也展轉相訓杜元凱本之楚靈王誇功利多嗜慾不能修身自勝以歸於禮故劉光伯疏有嗜慾與禮義交戰之說此以釋左氏而非以釋論語也馬季長以克己為約身者能修己自勝約儉其身即下文非禮勿動四者是范武子訓克為責責己失禮而復之與下文四勿義亦通馬氏約身之訓即論語以約失之者鮮矣之約約身則非禮勿視聽言動故克己復禮連文左傳論語馬杜范劉等說義本

互通惟劉光伯嗜慾之言意主楚靈王而邢叔明襲之以釋論
語遂開集注訓已為私欲之端與全部論語人已對舉之文方
言鑿衲之不合矣

仁舊貫解 戊辰仲冬

魯人為長府閔子騫曰仍舊貫如之何何必改作子曰夫人不言言必有中集解引鄭康成注曰長府藏名也藏財貨曰府仍固也貫事也因舊事則可何乃復更改作也經典釋文引鄭云魯讀仍為仁今從古元和惠氏棟九經古義云揚雄將作大匠箴曰魯作長府而閔子不仁是用魯論語也按子張問仁子曰能行五者於天下為仁矣恭則不侮寬則得衆信則人任焉敏則有功惠則足以使人又子曰道千乘之國敬事而信節用而愛人使民以時庸謂恭則不侮信則人任者敬事而信也恭敬一也敏則有功寬則得衆者節用而愛人也大學所謂生財有

大道生之者衆食之者寡爲之者疾用之者舒則財恒足也敏
疾一也寬則愛人而得衆矣惠則足以使人者使民以時也以
時則爲惠矣孔子所言道千乘之國卽爲邦之道與答子張問
仁能行五者於天下則爲仁事事卽合道千乘國章雖不言仁
究其旨則言仁之尤也魯人爲長府而閔子不仁者不愛人使
民不以時也不愛人則非惠不以時則不足以使人矣不節用
則傷財安能閔則有功故閔子言仁在舊貫貫事也事舊而不
改作也改作更新不節用不愛人則不仁矣此與中庸注相人
偶之說及論語論仁諸章義俱昭合魯論語出仁字較之古論
作仍義尤明切此章專記魯事固當從魯本爲定揚子雲鄭康

成之言極可據矣

孟子言伯夷論 乙卯季夏

伯夷聖之清者也孔子稱其求仁而得仁而孟子以為隘過矣
子云吾未見好仁惡不仁者惡不仁者其為仁矣不使不仁者
加乎其身夫好仁之人必深惡不仁惡人不仁之甚者也不立
於惡人之朝故非其君不事不與惡人言故非其友不友伯夷
求仁得仁是真知好仁惡不仁者不事不友所以全其惡之之
實而不使稍加乎身而肯立其朝與之言以盛服辱在泥塗哉
屈原曰人誰能以身之察察受物之汶汶又安能以皓皓之白
而蒙世之溫蠖乎孰謂屈原所不為而伯夷為之哉推惡惡之
心思與鄉人立其冠不正望之然去之若將浼焉孟子推論之

嚴元照曰所用楚詞如
無所本則宜用正文

旨可謂微至此可見伯夷惡惡真切為之杜漸防微冠不正即去自無袒裼裸裎於我側者矣柳下惠之不恭由於不屑去也蓋人之以無禮加於我也必由其漸始而冠不正續而袒裼終而裸裎而我之失禮也由於不恭人之冠不正而不知不急為之去將習見焉必有已之冠不正而亦不知矣君子正其衣冠尊其瞻視儼然人望而畏之是之謂威而不猛我之冠非有不正奚為與不正者偕哉趙邠卿云伯夷不絜諸侯之行故不忍就見殷之末世諸侯多不義後乃歸於西伯夫論人之善惡當核其實而辭命為虛諸侯而善其辭命雖不善可受可就也諸侯而不善其辭命雖善不可受不可就也文王伐密伐崇武王

伐奄滅國者五十是商季諸侯之不善較著受而就之何異因
魏瑩之卑禮厚幣而往見之哉此則伯夷之所不為也伯夷以
辟紂居北海濱聞文王作而歸之然則諸侯誠善雖無辭命之
招且往就焉而非然者宜伯夷之所不屑已子云不降其志不
辱其身伯夷叔齊與使立惡人朝與惡人言偕冠不正者立而
就虛辭之諸侯尚可謂之下降志辱身歟又云伯夷叔齊不念
舊惡怨是用希則伯夷雖惡惡而不念其舊故被其惡者不之
怨此正寬容之德本諸躬而驗諸人者安得謂之隘哉後之君
子與其學柳下惠也無寧學伯夷

夫死適人及出妻論 乙卯季夏

作禮教以教天下後世者聖人聖人之於人原之以情斷之以法行之無弊而可久而非鯁一節之末遇變而清決大敗者周公聖之集大成者乎定喪服禮有繼父出妻之文父者子之天也天可繼乎然備繼父之道從而繼父之明夫死妻得適人也若夫死妻稚子幼又無大功之親而不許其適人必母子交斃矣人生本乎天故為天民聖人不輕責人死匹夫匹婦無罪而禁之窮餓以至殞滅是謂天天之民聖人之心不若是之忍也且夫婦之禮唯及七十同藏無間妾雖老年未滿五十必與五日之御改適者較之壹與之齊終身不改者固不可以同年

語然無夫而有夫。藉以養廉恥之心。免飢寒之困。則猶合乎禮之變。後世庶民之家。改適者有之。士大夫之族。以為恥而不行。究之年齒壯艾。衣食空乏。有反不如適人有夫之為愈矣。宋儒言貧窮無託而再嫁。只是後世怕餓死之說。然餓死極小失節極大。不知禮經稱繼父。檀弓記公叔木狄儀。皆有同母異父之昆弟。事非起於輓近。以餓死為極小。論亦過刻。安得以士君子守身之義。驟責之愚婦人。夫死有嫁者。即有娶者。而宋儒言婦不可取。凡取以配身。若取失節者。配身是已失節也。然婦人化於人者也。非化人者也。已賢取再醮之婦。何傷。已不賢取守義之女。奚益。正己之君子而介。於此未矣。余弟禮堂曰。古聖

嚴元照曰在宋儒有不
得不為之厲禁者時
不同也

人之意貴男而賤女故男子可以繼室婦人不得再嫁易曰婦
人從一而終夫子制義其是之謂矣孔子刪詩存柏舟篇以為
婦人之常法俾天下後世有表式焉然苦節不可貞聖人不強
責人之所難故於禮微著其文而不明示以再嫁再嫁之事古
多有之不聞以為深詒後世節義廉恥事不違古人而諱忌
再嫁之失乃獨過於古人於是有名為守節而實不守節者其
亦知聖人原人情之意固不若是之刻以至有病而不可救歟
嗚呼信義之重唯諾不變矧夫婦一體邪世有實心守義生死
不渝者吾將與衛之共姜同致其感泣欽慕又何議焉夫婦為
人倫之本而禮經有出妻之文何也聖人有互不娶悔之於先

三不去防之於後始有七出之條故不順父母者出婦事舅姑如事父母不順為逆德勢必臨夫於不孝人子可溺牀第之私致拂親心乎內則曰子甚宜其妻父母不說出子不宜其妻父母曰是善事我子行夫婦之禮焉沒身不衰是妻之去留固以父母之說否為準者無子者出取妻為嗣續計無子將有絕世之慘不出更娶何待孟子曰不孝有三無後為大嘗見有不產之婦而復禁夫納妾遂至坐視其滅宗故與嫉妬者同出也淫僻犯禮之大防且有亂族之禍古有七出今止一出知羞惡之心未嘗盡泯惡疾者出謂不可同事宗廟供粢盛也禮主婦薦豆設羹絕於天者棄於祖祖考神靈之所在俾天刑之婦廁其

旁是為潰祖褻宗孝子慈孫之心必有所大不忍者心之不忍則不為也多口舌與竊盜較之五者似輕然離親間戚兆端起釁皆由於多口舌歌曰彼婦之口可以出走詩曰婦有長舌雖厲之階竊盜則反義敗常漸至不齒人列同心同德之謂何而醜行若此故俱不免於出已蓋一家之中父子兄弟以天合者夫婦以人合者以天合者義無可分以人合者義合則合義不合則分故夫死不禁其適人妻不賢而可出出之夫得復娶妻亦可再嫁明天與人之不同也孔門禮法之宗而伯魚之母出子上之母出曾元之母出自末世視之鮮不以為薄義不情者而孔子子思曾子皆大聖賢躬行不諱亦獨何哉誠以婦人義

有三從道無專制施衿結縵所丁寧告誡者惟無違一言而苟
犯七出必去勿疑此陽剛陰柔之理庶婦人之心有所懼而不
敢肆雖悍妬者莫不斂戢聽命焉此法不行陽為陰屈夫制於
倫綱數壞不可究極書曰牝雞無晨牝雞之晨惟家之索可勝
慨歟內則曰子放婦出而不表禮焉蓋雖不順父母而出猶不
明言其不順如曾子以蒸梨不熟為名是已近世多割鼻剪髮
苦節烈志之婦亦有不堪自問焉者賢不肖蓋未可以等論出
妻萬一有之人不屑取遂終為棄人或歆恨而不得其死知古
道之難行也去周公孔子之世久矣

為妾服總議并釋 丙辰仲夏

議曰考之禮為妾服總者有二文一儀禮喪服總麻三月章云
貴臣貴妾此公卿大夫禮但別妾之貴賤而定服不問其有子
否也一禮記喪服小記曰士妾有子而為之總無子則已此士
禮但論子之有無為準無貴賤之足殊也然則既非天子諸侯
有南面之尊降其臣妾無服而若王朝之公若卿若大夫若士
固莫不為妾製總服矣傳曰夫尊於朝妻貴於室姪娣者亞於
妻長於衆妾故謂之貴因乎夫而妾之貴因乎君及君妻其輔
佐陰教贊襄內子命婦之職與有勞焉經曰昔者明王之以孝
治天下也不敢失於臣妾於此見之非第從厚已也不曰有子

之妾而曰貴妾明既貴雖無子猶為之服非若士妾之必問其子也曲禮記曰大夫不名世臣姪弟士不名家相長妾是卿大夫之貴妾猶士之長妾故熊氏以長妾為弟後世弟姪禮廢當以齒長者為長妾即以齒長有子者為貴妾士部尚書周之六卿今制總督與尚書等以公卿大夫禮考之知夫人某氏適當貴妾之位其應服總一也經以士禮為定體周道貴貴大夫降於士後世無貴賤輕重之差多從士禮為斷慈母如母有子則為之總以士禮定之又屬有子之妾其應服總二也儀禮一經周公手定唐韓愈苦其難讀宋王安石廢罷之不立學官後以小戴記代之習此經者益鮮然禮記記也非經也於所記喪禮

又往往有闕勿讀殊失聖人慎終意今旁證之喪服小記而上
考之周公本經為貴妾有子者服總無疑時王之制與古聖之
經並行不悖所貴閤通博達之儒為能引經斷事臨事參定不
拘世俗所見而各即乎天理人心之安庶達而在上即可奏議
勒為常法於風俗民心有厚無薄也謹議并采摭舊文為之釋
儀禮喪服第十一貴臣貴妾注此謂公士大夫之君也殊其
臣妾貴賤而為之服貴臣室老士也貴妾姪婦也天子諸侯
降其臣妾無服士卑無臣妾又賤不足殊有子則為之總無
子則已釋曰此謂公士大夫之君也者若士則無臣又不得
簡妾貴賤天子諸侯又以此二者無服則知為此服者是公

卿大夫之君得殊其臣妾貴賤而為之服也云貴臣室老士也者上斬章鄭已注云室老家相也士邑宰也云貴妾姪娣也者案曲禮曰大夫不名家相長妾士昏禮云雖無娣媵先是士姪娣不具卿大夫有姪娣為貴妾可知故曰貴妾姪娣也云天子諸侯降其臣妾無服者以其絕其已下故也云士卑無臣者孝經以諸侯天子大夫皆云爭臣士有爭友是士無臣也云妾又賤不足殊者以大夫已上自貴妾亦有貴士自賤妾亦隨之賤者故云妾又賤不足殊也云有子則為之總無子則已者喪服小記文傳曰何以總也以其貴也釋曰發問者以臣與妾不應服故發問之曰答曰以其貴也以非

南面故簡貴者服之也禮記喪服小記第十五士妾有子而
為之總無子則已注士卑妾無男女則不服不別貴賤正義
曰大夫貴妾雖無子猶服之故喪服云大夫為貴妾總是別
貴賤也士妾賤士妾無子則不服不殊別妾之貴賤曲禮下
第二國君不名卿老世婦大夫不名世臣姪娣士不名家相
長妾注雖貴於其國君家猶有所尊也卿老上卿也世臣父
時老臣正義曰世婦謂兩媵也次於夫人而貴於諸妾也大
夫不得呼世臣及貴妾名長妾妾之有子者也能氏云士有
一妻二妾言長妾者當謂娣也

昆弟兄弟釋異 庚午仲春

昆弟者一體之親故自同父同母下至同族均有是稱二本之
誼也至兄弟雖亦昆弟之通稱對言之則有親疎之別故自大
功以上為昆弟小功以下為兄弟若推廣言之不特同姓之親
通謂之兄弟即父黨母黨妻黨均有兄弟之稱之兼異姓言之
矣此二者不同之大致也今各引經以證明之許氏說文解字
云弟韋束之次第也以古文之象凡弟之属皆从弟齊周人謂
兄曰弟从弟从累臣鉉等曰累目相及也兄弟親比之義爾雅
釋親弟兄也郭景純注云今江東人通言弟毛詩葛藟終遠兄
弟謂他人昆傳曰昆兄也儀禮喪服昆弟鄭注云昆兄也是弟

字下从次第之弟。上从眾為目相及親比之誼。乃周人名兄之
定稱爾雅毛詩傳同。鄭注禮經本之。其文以从眾从弟為正。爾
雅作弟者。第之省變。詩禮作昆。直第之同聲假借字耳。說文目部昆同
也从比說文兄長也。从儿从口凡兄之属皆从兄。廣雅釋詁下
兄大也。釋親兄況也。白虎通三綱六紀篇兄者況也。況父法也。
釋名釋親属兄荒也。荒大也。故青徐人謂兄為荒也。詩常棣況
也。永歎毛傳曰況茲也。桑柔倉兄。慎令毛傳曰兄滋也。名是職
兄斯引毛傳曰兄茲也。是兄為長大之通稱。滋兄之本義。故宗
族母妻之黨及婚姻之親。均有兄弟之稱。白虎通廣雅以兄為
況者。兄況同字。釋名以兄為荒者。取聲近者為訓。常棣傳以況

為慈桑柔傳以兄為滋台是傳以兄為滋韋昭國語注以況為慈義
並同是兄字讀本滋益故兄弟之稱亦施之彌廣不若第為目及親
比特施之一體之人而已釋親言宗族曰父之兄弟先生為世父後
生為叔父父之從父兄弟為從祖父父之從祖兄弟為族父族父
之子相謂為族弟弟族弟弟之子相謂為親同姓兄之子弟之子
相謂為從父弟弟父之從父弟弟之母為從祖王母父之從祖弟
弟之母為族祖母母黨曰母之弟弟為舅母之從母弟弟為從舅
母之姊妹為從母從母之男子為從母弟弟其女子為從母姊妹
妻黨曰妻之弟弟為甥女子謂弟弟之子為姪弟弟之文凡十五

見皆一本之誼也。從母之男子亦有第第之稱者。父子為一體。母子亦一體。言父以該母也。昆弟為一體。姊妹亦一體。言昆弟以該姊妹也。故母與從母為一體。其所生男子亦從母而為昆弟。妻宗族曰男子。先生為兄。後生為弟。妻黨曰女子。謂兄之妻為嫂。弟之妻為婦。婚姻曰夫之兄為兄。公夫之弟為叔。此兄弟並昆弟之通稱也。又婚姻曰父之黨為宗族。母與妻之黨為兄弟。婦之黨為婚兄弟。婿之黨為姻兄弟。郭注云。古者皆謂婚姻為兄弟。此兄弟又父母黨妻黨之通稱也。郭註行業以母黨次父黨而言故與妻黨同為兄弟耳以母黨對父黨而言仍與父黨同為昆弟矣此親親之仁亦親親之義禮之所生也儀禮喪服衰齊期不杖麻屨者。祖父母傳曰何以期也。至尊也。世父母、叔父母傳曰何以期也。與尊者

一體也然則昆弟之子何以亦期也旁尊也不足以加尊焉故報之也父子一體也夫妻一體也昆弟一體也故父子首足也夫妻畔合也昆弟四體也故昆弟之義無分然而有分者則辟子之私也子不私其父則不成其子故有東宮有西宮有南宮有北宮異居而同時有餘則歸之宗不足則資之宗禮記雜記下父母之喪將祭而昆弟死既殯而祭如同宮則雖臣妾葬而后祭鄭注云言若同宮則是昆弟異宮也古者昆弟異居同時有父母之祭當在殯宮而在異宮者喪服期章繼父同居者傳曰何以期也傳曰夫死妻稚子幼子無大功之親與之適人而所適者亦無大功之親所適者以其貨財為之築宮廟歲時使

之祀焉妻不敢與異鄭注云子無大功之親謂同財者也案古
者大功以上雖異居而同財故經記言昆弟傳言大功之親說
者俱指同財言之明昆弟為大功以上之定稱也喪服齊衰期
章曰昆弟昆弟之子大夫之庶子為適昆弟女子子適人者為
其昆弟之為父後者夫之昆弟之子大夫之子為世父母叔父
母子昆弟昆弟之子大功九月章曰從父昆弟為人後者為其
昆弟女子子適人者為衆昆弟大夫為世父母叔父母子昆弟
昆弟之子為士者公之庶昆弟大夫之庶子為母妻昆弟皆為
其從父昆弟之為大夫者為夫之昆弟之婦人子適人者大夫
大夫之妻大夫之子公之昆弟為姑姊妹女子子嫁於大夫者

小功祔麻帶經五月章曰昆弟之下殤大夫庶子為適昆弟之
下殤為人後其為其昆弟從父昆弟之長殤昆弟之子女子子
夫之昆弟之子女子子之下殤大夫公之昆弟大夫之子為其
昆弟庶子姑姊妹女子子之長殤小功祔麻經即葛五月章曰
從祖昆弟公之昆弟為從父昆弟庶孫姑姊妹女子子適士者
總麻三月章曰族昆弟從祖父從祖昆弟之長殤從父昆弟姪
之下殤從祖昆弟之子從母昆弟君母之昆弟從父昆弟之子
之長殤昆弟之孫之長殤為夫之從父昆弟之妻記公子為其
母曰大夫公之昆弟右昆弟之文凡三十有八皆一本之誼也
其服制之差雖有總小功之不同而莫不本大功以上一體之

恩故通謂之昆弟也。又齊衰三月章曾祖父母傳曰何以齊衰三月也。小功者兄弟之服也。不敢以兄弟之服服至尊也。記大夫之子於兄弟降一等。為人後者於兄弟降一等。報於所為後之兄弟之子。若子兄弟皆在他邦。加一等。不及知父母與兄弟居加一等。傳曰何如則可謂之兄弟。傳曰小功以下為兄弟。鄭注云於此發兄弟傳者嫌大功已上又加也。大功已上若皆在他國則親自親矣。若不及知父母則固同財矣。既夕禮兄弟出主人拜送。注云兄弟小功以下也。異門大功亦可以歸此兄弟為小功以下之定稱。與昆為通大功以上言之。固不侔矣。更證之以禮記檀弓曰曾子曰小功不稅則是遠兄弟終無服也。而

可乎公叔林有同母異父之昆弟死問於子游子游曰其大功
乎亦明以大功為昆弟小功為兄弟也又曰有殯聞遠兄弟之
喪雖總必往非兄弟雖鄰不往所識其兄弟不同居者皆弔是
皆舉小功以下言之也檀弓下妻之昆弟為父後者死哭之適
室非為父後者哭諸異室有殯聞遠兄弟之喪哭於側室無側
室哭於門內之右喪服小記生不及祖父母諸父昆弟而父稅
喪已則否降而在總小功者則稅之雜記下父母之喪將祭而
昆弟死既殯而祭如同宮則雖臣妾葬而后祭奔喪篇聞遠兄
弟之喪既除喪而后聞喪免袒成踊是皆以期大功為昆弟總
小功為兄弟與禮經合鄭注檀弓曰日月已過乃聞喪而服曰

稅大功以上然小功輕不稅注喪服小記曰謂正親在齊衰大功者親總小功不稅矣注奔喪曰小功總麻不稅者也雖不服猶免袒與二禮相符證至通言之兄弟之稱有自大功以上者如禮記雜記聞兄弟之喪大功以上見喪者之鄉而哭奔喪篇凡喪父在父為主父沒兄弟同居各主其喪者是也有自大功以下言者如曾子問孔子曰天子諸侯之喪祭也不斬衰者不與祭大夫齊衰者與祭士祭不足則取於兄弟大功以下者又雜記有父母之喪尚幼衰而附兄弟之殤則練冠袒注云此兄弟之殤謂大功親以下之殤也斬衰齊衰之喪練皆受以大功之衰此謂之功衰是也更推廣言之詩葛藟終遠兄弟箋云兄

弟猶言族親也儀禮士冠禮兄弟畢袵元注云兄弟主人親戚也喪服記大夫之子於兄弟降一等注云兄弟猶言族親也凡妾為私兄弟如邦人注云私兄弟目其族親也此兄弟並專指宗族言之也詩正月洽比其鄰昏姻孔云箋云云猶友也書尹氏富與兄弟相親友為朋黨也周禮大司徒以本俗六安萬民三曰聯兄弟注云兄弟昏姻嫁娶也儀禮士昏禮見主婦注云見主婦者兄弟之道宜相親也禮記曾子問曰昏禮既納幣有吉日女之父母死則如之何孔子曰壻使人弔如壻之父母死則女之家亦使人弔壻已葬壻之伯父致命女氏曰某之子有父母之喪不得嗣為兄弟使某致命注云必使人弔者未成兄

弟公羊僖二十有五年宋蕩伯姬來逆婦其言來逆婦何兄弟
辭也其稱婦何有姑之辭也何邵公注云宋魯之間名結昏姻
為兄弟又三十有一年冬杞伯姬來求婦其言來求婦何兄弟
辭也其稱婦何有姑之辭也穀梁宣十年春公如齊公至自齊
齊人歸我濟西田公娶齊齊繇以為兄弟友之范武子注云齊
由以婚姻故還魯田此兄弟並專指婚姻言之也詩伐木兄弟
無遠憂云兄弟父之黨母之黨儀禮聘禮若兄弟之國則問夫
人注云兄弟謂同姓若昏姻甥舅有親者問猶遺也謂獻也非
兄弟獻不及夫人既夕禮凡將禮必請而後拜送兄弟贈奠可
也所知則贈而不奠注云兄弟有服親者可且贈且奠許其厚

也所知通問相知也降於兄弟禮記奔喪與諸侯為兄弟亦為
佐而哭注云族親婚姻在異國者左氏襄三年晉使士匄告于
齊曰寡君願與一二兄弟相見以謀不協注云列國之君相謂
兄弟此兄弟並兼宗族母黨妻黨婚姻言之也今以儀禮爾雅
為本而參證之以羣經詳釋昆弟兄弟之異如是

說經之文曲暢至矣無復可加郝懿行記

弟婦釋丙辰孟春

親屬相謂之別爾雅辨之詳矣妻黨曰女子謂兄之妻為嫂弟之妻為婦郭璞注云猶今言新婦是也儀禮喪服傳其夫屬乎父道者妻皆母道也其夫屬乎子道者妻皆婦道謂弟之妻婦者是嫂亦可謂之母乎鄭注道猶行也謂弟之妻為婦者卑遠之故謂之婦嫂者尊嚴之稱嫂猶叟也叟老人稱也是為序男女之別爾若已以母婦之服服兄弟之妻以舅子之服服已則是亂昭穆之序也案經傳之文是為服制而言非為名分而言也蓋弟妻雖為婦而實不服婦之服兄妻雖為嫂而實不服母之服此所以明其等而殺其禮若據弟妻為婦而遂以婦服服之則

嫂亦可以母服服之是亂父子之序矣蓋弟妻推而遠之故假以婦名而實不服婦服猶嫂之不服母服也差同等之人而使之下等所以厚男女之別而遠嫌疑之漸耳據爾雅儀禮之文則知兄妻稱嫂弟妻稱婦自三代以至漢晉皆然郭注爾雅猶今言新婦是也蓋晉時有是稱今則為弟新婦矣孔子為政必以正名為先一家之中名分攸關不容稍紊余有三弟常俗稱謂頗俗因釋弟婦以詔之

魯惠公夫人子氏考 乙卯季夏

春秋隱公二年十有二月乙卯夫人子氏薨左氏以子氏為桓公母公羊以為隱公母穀梁以為隱公妻按左傳惠公元妃孟子早卒仲子生而有文在其手曰為魯夫人故仲子歸於我生桓公而幼是以隱攝立而奉桓為太子從鄭仲師義惠公之薨也有宋師太子又少故葬有闕元年冬十月改葬惠公隱弗敢為喪主故不書則桓為太子子氏為夫人傳有明文矣故經元年不書公即位明隱之不得為君也魯君臣以仲子為夫人生而有夫人之瑞嫁娶以夫人之禮卒以夫人薨赴告於諸侯經之書夫人子氏不沒其實也杜元凱云隱公繼室之子當嗣世夫聲

子為孟子之姪娣妾也隱公妾之子桓公夫人之子是當嗣世者桓也非隱也杜又云桓未為君仲子不應稱夫人不知仲子於惠公之世本稱夫人不像子之為君與否也經元年秋七月天王使宰咺來歸惠公仲子之賵傳曰子氏未薨預凶事非禮也可證子氏之為惠公夫人仲子故天王豫賵之不書葬而不祔姑也五年九月考仲子之宮是別為仲子立廟矣禮無二嫡仍夫人之名以明當日之踰禮固不祔於姑不書葬以示仲子不當稱夫人此經之微而顯也公羊以為隱母不知隱母妾也非夫人也隱攝立不書即位不為君母惡得稱夫人左氏經三年夏四月辛卯君氏卒傳曰聲子也不赴於諸侯不反哭於寢

不祔於姑故不曰薨不稱夫人故不言葬不書姓為公故曰君
氏則隱母之卒在三年也公羊又以不書為成公之意言子將
不終為君母亦不終為夫人然已見為君而豫屈其母不得為
夫人無益於讓有損於孝始為夫人終不為夫人嫡妾之辨名
分之等竟可隨意進退反以聖人為賢而成其意不乖之甚乎
穀梁以為隱妻夫隱攝位將讓之桓母不稱夫人妻稱夫人乎
以不書葬為夫人之義從君范甯注隱弑賊不討故不書葬然子氏之薨遠在
隱公被弑之前不當逆知不書亦不當既書追削之也公穀兩
家頗失事實核之三傳左氏為長今從之

五岳釋庚申孟秋

周禮職方氏掌天下之圖東南曰揚州其山鎮曰會稽正南曰
荊州其山鎮曰衡山河南曰豫州其山鎮曰華山正東曰青州
其山鎮曰沂山河東曰兗州其山鎮曰岱山正西曰雍州其山
鎮曰嶽山東北曰幽州其山鎮曰醫無閭河內曰冀州其山鎮
曰霍山正北曰并州其山鎮曰恒山大司樂凡日月食四鎮五
嶽崩鄭康成注四鎮山之重大者謂揚州之會稽青州之沂山
幽州之醫無閭冀州之霍山五嶽岱在兗州衡在荊州華在豫
州嶽在雍州衡恒在并州案爾雅釋山云河南華河西嶽河東岱
河北恒江南衡與周禮職方合詩崧高正義引雜問志云周都

豐鎬故以吳岳為西岳是釋山篇首所列為西周之定典故鄭公注大司樂據之與周禮本經合邵二雲學士曰華山在成周境內故首舉之吳岳在岐周境內故次列之中庸載華嶽而不重舉華嶽可該五岳左氏昭四年傳司馬倭曰四岳三塗陽城太室別太室於四岳明嵩高不得稱岳是也釋山後言泰山為東嶽華山為西嶽霍山為南嶽恒山為北嶽嵩高為中嶽與篇首文異案史記封禪書述尚書四嶽曰岱宗泰山也南嶽衡山也西嶽華山也北嶽恒山也中嶽嵩高也又曰昔三代之君皆在河洛之間故嵩高為中嶽而四嶽各如其方四瀆咸在山東至秦稱帝都咸陽則五嶽四瀆皆并在東方於是自殷以來名

山五曰太室恒山泰山會稽湘山自華以西名山七曰華山薄
山岳山岐山吳岳鴻冢瀆山下言漢武巡南郡至江陵而東登
禮滯之天柱山號曰南岳然則五嶽之位唐虞三代皆同周之
文武起自西岐建都豐鎬故取吳岳為西岳以華山為中岳及
平王東遷仍用夏商之制以嵩高為中岳華山為西岳爾雅前
所述者為成王周公之制以序文武舊典後所述者則夏殷之
禮及平王東遷後事也鄭公初無定說故注大宗伯職用後義
秦制蓋與三代同太史公稱秦都咸陽五嶽皆在東是秦以華
山為西嶽而不取吳岳地理志衡在長沙湘南縣故謂衡山為
湘山也詩崧高正義引郭璞爾雅注云霍山今在廬江潛縣西

南別名天柱山漢武帝以衡山遼曠移其神於此今其土俗人皆呼之為南岳南岳本自以兩山為名非從近也而學者多以霍山不得為南岳又言從漢武帝始乃名之如此言為武帝在爾雅前乎斯不然矣竊以璞言為然何則璞定以霍山為誤當作衡案書傳虞夏傳及白虎通風俗通廣雅並云霍山為南岳豈諸文皆誤明是衡山一名霍也以上出詩正義今本爾雅郭注闕今案郭氏言漢

武帝移衡山神於霍山又述學者以漢武帝始名霍山為南岳與封禪書所言正合此以霍山為南岳為出漢武帝以後事之明證孫叔然注爾雅以霍山當作衡山精之至也故毛公傳詩崧高曰東岳岱南岳衡西岳華北岳恒鄭公大宗伯注五岳東

曰岱宗南曰衡山西曰華山北曰恒山中曰嵩高山皆用爾雅
後說又說嵩高正義引孝經鉤命決云五岳東岳岱南岳衡西
詩崧岳華北岳恒中岳嵩高是五岳又數嵩高之文也王肅之注尚
書服虔之注左傳鄭氏之注大宗伯皆作衡不作霍字係後人
誤改非爾雅原文矣乃郭氏好乖舊義謂南岳本自以兩山為
名遂至合衡霍為一詩正義更據大傳白虎通風俗通廣雅等
皆作霍字謂不得諸文皆誤不知大傳固非盡出伏生手傳其
學者多所附益而班孟堅應仲瑗皆東漢人張稚讓魏人並在
漢武之後猶東晉廬江土人之呼霍山為南岳輟轉謠襲為足
據乎

頌釋 己巳季春

一釋頌為古文容字

說文頁頭也从頁从儿古文頌首如此頌貌也从頁公聲頌籀文頌从容徐曰此容儀字歌誦者美盛德之形容故通作頌後人因而亂之以字為歌頌字

徐傳本韻會

詩序頌者美盛德之形

容以其成功告於神明者也

鄭譜頌之言容天子之德光被

四表格于上下無不覆燾無不持載此之謂容 周禮太師教

六詩曰雅曰頌注雅正也言今之正者以為後世法頌之言誦

也容也誦今之德廣以美之 眡瞭擊頌磬笙磬注磬在東方

曰笙笙生也在西方曰頌頌或作庸庸功也 儀禮大射儀頌磬

注古文頌為庸

案此頌字古音本請如容

禮記樂記正義曰劉向所校二

十三篇著於別錄今樂記所斷取十一篇餘有十二篇其名猶

在招本第二十一昭頌第二十二

案招昭皆與韶通招本者言其德昭頌者記其容合之漢

書儒林傳可證古禮容樂容字皆作頌也

漢書儒林傳魯徐生善為頌蘇林云漢

舊儀有二郎為此頌貌威儀事不知經但能盤辟為禮容管

子牧民第一國頌尹注頌容也謂陳為國之形容

案頭為容貌之首故古容貌字从頁頁古文首字籀文作頌

即从今容貌字尤足為證凡字有本義有引申之義容貌為

頌字之本義引伸為美盛之形容以誦其成功因為歌誦字

又通於庸訓為功皆容貌之引申也世俗所謂樣字即容字

之轉聲容永義樣皆聲相轉魯徐生善為頌者善為禮容之

樣子也

相帶周禮卿大夫之職四日和容杜子春讀和庸為和頌蓋足證頌為古容字

一釋頌有琴瑟工歌

禮記文王世子始之養也適東序釋奠於先老遂設三老五更

羣老之席位焉適饌省醴養老之珍具遂發咏焉退修之以孝

養也反登歌清廟

席工於西階上歌清廟以樂之

既歌而語以成之也言父子

君臣長幼之道合德音之致禮之大者也

既歌謂樂正告正歌備也

下管象

舞大武

象周武王伐紂之樂也以管攜其聲又為之舞皆於堂下

明堂位季夏六月以禘

禮祀周公於太廟升歌清廟下管象

清廟周頌也象謂周頌武也以管攜之

樂

記清廟之瑟朱絃而疏越壹倡而三歎有遺音者矣

清廟謂作樂歌清廟

也宋陸綽朱陸綽則聲濁越瑟底孔也畫疏之
使聲遜也倡發歌句也三數三人從數之也

又子貢見師乙

而問焉曰賜聞樂歌各有宜也若賜者宜何歌也師乙曰寬而

靜柔而正者宜歌頌廣大而靜疏達而信者宜歌大雅恭儉而

好禮者宜歌小雅正直而靜廉而謙者宜歌風肆直而慈愛者

宜歌商溫良而能斷者宜歌齊夫歌者直己而陳德也動已而

天地應焉四時和焉星辰理焉萬物育焉故商者五帝之遺聲

也商人識之故謂之商齊者三代之遺聲也齊人識之故謂之

齊明乎商之音者臨事而屢斷明乎齊之音者見利而讓臨事

而屢斷勇也見利而讓義也有勇有義非歌孰能保此祭統

夫大嘗禘升歌清廟下而管象

清廟頌文王之詩也管象
吹管而舞武象之樂也

仲

尼燕居子曰禮猶有九焉大饗有四焉苟知此矣雖在猷猷之

中事之聖人矣

大饗謂饗諸侯來朝者也四者謂金再作升歌清廟下管象也

兩君相見揖讓

而入門入門而縣興揖讓而升堂升堂而樂闋下管象武夏籥

序興

下謂堂下象武武舞也夏籥文舞也序興更也堂下吹管舞文武七樂更起也

陳其薦俎序其禮

樂備其百官如此而后君子和仁焉行中規還中矩和鸞中采

齊容出以雍撤以振羽是故君子無物而不在禮矣

采齊雍振羽皆樂章

也振羽振鸞及雍舍作

入門而金作示情也升歌清廟示德也

相示以德也清廟頌

文王下而管象示事也

相示以事也象武武王之大事也

是故古之君子不必

親相與言也以禮樂相示而已

正義曰下管象武者謂升歌清廟是大饗之三也堂下管中吹

象武之曲是大饗之四也但此下管象武之上少升歌清廟一句下文既詳故於此略之夏籥序興者夏籥謂大夏文舞之樂

以象武次序
更進而興

春秋左氏傳襄公二十九年吳公子札來聘請

觀於周樂使工為之歌頌曰至矣哉五聲和八風平節有度守

有序盛德之所同也

頌有殷魯故曰
盛德之所同

虞書傳云古者帝王升

歌清廟之樂大琴練弦

漢書禮樂志高祖時叔孫通因秦樂

人制宗廟樂乾豆上奏登歌獨上歌不以筦弦亂人聲欲在位

者偏聞之猶古清廟之歌也

案季札觀周樂使工為之歌頌而曰盛德之所同故杜注謂

兼殷魯言之師乙對子貢之間曰寬而靜柔而正者宜歌頌

此亦當包殷魯或據鄭注肆直而慈愛者宜歌商云商宋詩

也固疑宋止言周不知師乙於頌外別言商於風外別言齊

而以為五帝三代之遺聲因商齊人識之故謂之商齊則非
商頌齊風矣是三頌皆可歌周頌尤明文足證如清廟如振
鷺如雍如舞武皆經傳所見其琴瑟工歌固與國風小大雅
同也

一釋頌有鐘鐃鼓磬

周禮大司樂王出入則令奏王夏尸出入則令奏肆夏牲出入

則令奏昭夏

三夏皆樂章名

大饗不入牲其他皆如祭祀

大饗饗賓客也不入牲牲

不入亦不奏昭夏也其他謂王

大射王出入令奏王夏

釋曰案禮器大

饗其王事與又云其出也肆夏而送之鄭注云肆夏當為陟夏
彼賓出入奏肆夏與此大饗賓出入肆夏同而彼肆夏為陟夏
者彼鄭注大饗為祫祭先王祭末有燕而飲酒者宿醉之法與
卿飲酒宿醉而出奏陟夏同故破肆夏為陟夏此大饗饗諸侯

采朝則左傳云饗以訓恭儉設凡而不倚爵盈而不飲獻
依命數賓無醉理故賓出入奏肆夏與尸出入同也 樂

師教樂儀行以肆夏趨以采齊車亦如之環拜以鐘鼓為節

采齊皆樂名或曰皆逸詩謂人君行步以肆夏為節趨疾於步
則以采齊為節若今時行禮於太學罷出以鼓陵為節元謂行

者於大寢之中趨謂於朝廷外謂之趨 鐘師掌金奏凡樂事以鐘鼓
及曰堂上謂之行門外謂之趨

奏九夏 按此 王夏肆夏昭夏納夏昭夏齊夏族夏祗夏騶夏

鼓者先擊鐘次擊鼓以奏九夏夏大也樂之大歌有九故書納
作內杜子春云內當為納祗讀為陟鼓之陟王出入奏王夏尸

出入奏肆夏牲出入奏昭夏四方賓來奏納夏臣有功奏章夏
夏夫人祭奏齊夏族人侍奏族夏客醉而出奏陟夏公出入奏

騶夏肆夏詩也國語曰金奏肆夏繁過渠天子所以享元侯肆
夏繁過渠所謂三夏也呂叔玉云肆夏繁過渠皆周頌也肆夏

時邁也繁過執競也渠思文也肆遂也夏大也言遂於大位謂
王位也故時邁曰肆于時夏允王休之繁多也過止也言福祿

止於周之多也故執競曰降福穰穰降福簡簡福祿來反渠大
也言以后稷配天王道之大也故思文曰思文后稷克配彼天

故國語謂之曰皆昭令德以合好也元謂以文王虎鳴言之則
九夏皆詩篇名頌之族類也此歌之大者載在樂章樂崩亦從
而亡是以凡祭祀饗食奏燕樂樂此凡射王奏騶虞諸侯奏狸
頌不能具

首卿大夫奏采蘋士奏采蘋樂此笙師奏膚應雅以教祔樂

祔樂祔夏之樂應雅其畜者謂以築地笙師教之則三器
在庭可知矣賓辭而出奏陳夏以此三器築地為之行節明不

失禮凡祭祀饗射共其鐘笙之樂燕樂亦如之 鐸師掌金奏之

鼓凡祭祀鼓其金奏之樂饗食賓祭射亦如之 儀禮鄉飲酒

禮乃合樂周南關雎葛覃卷耳召南鵲巢采芣采蘋樂此

諸侯之樂大雅頌為天子之樂鄉飲酒為升歌小雅禮成者可

以進取也燕合鄉樂禮輕者可以遽下也春秋傳曰肆夏繁遏

渠天子所以享元侯也文王大明緜兩君相見之樂也然則諸

侯相與燕升歌大雅合小雅天子與次國小國之君燕亦如之
與大國之君燕升歌頌合大雅其笙聞之篇未聞釋曰納賓之
樂天子與五等諸侯同用肆夏是以燕禮納賓用肆夏禮記郊

時牲云大夫之奏肆夏由趙文子始也是大夫不得用之其諸侯以上同用之也

賓出奏陔

陔陔夏也陔之言戒

也終日燕飲酒罷以陔為節明無失禮也周禮鐘師以鐘鼓奏九夏是奏陔夏則有鐘鼓矣

燕禮賓醉奏

陔陔為行節也凡夏以鐘鼓奏之記若以樂納賓則賓及庭奏

肆夏賓拜酒主人荅拜而樂闋公拜受爵而奏肆夏公卒爵主

人升受爵以下而樂闋肆夏樂章也今亡以鐘鐃播之鼓登應

以敬也卿大夫有王事肆夏樂章也今亡呂叔玉

事之勞則奏此樂焉大射儀公升即席奏肆夏肆夏樂章名

云肆夏時邁也時邁者太平巡狩祭山川之樂歌奏此肆夏

以延賓其著宣王德勸賢與國禮曰賓出入奏肆夏賓醉奏

陔陔夏樂章也其歌頌類也賜鐘人于門內雷遂出鐘人以鐘

鼓奏陔夏賜之而明公入驚驚夏亦樂章也以鐘鼓奏之其詩

離醉志禮不忘樂今亡此公出而言入者射官在却

以將運為入燕不驚禮記禮器大饗其王事與威其饌與肯

者於路寢無出入也

謂給祭先王

各以其國之所有其出也肆夏而送之蓋重禮也

出謂諸侯之宿也禮畢而出

出作樂以節之肆夏當為既夏

正義曰大司樂之文大饗諸侯

則諸侯出入奏肆夏此經是助祭之後無算爵禮畢客醉而出

宜奏既夏故燕禮大射賓

郊特牲賓入大門而奏肆夏示易

以敬也

賓朝聘者易和悅也

卒爵而樂闋孔子屢歎之庭燎之百由齊桓

公始也

偕天子也

大夫之奏肆夏也由趙文子始也

偕諸侯趙文子晉大夫名武國

義曰

周禮九夏王夏者天子所用其餘八夏諸侯皆得用之其

虞夏卿大夫亦得用之故鄉飲客醉而出奏既夏但非堂下正

樂所用也玉藻古之君子必佩玉右徵角左宮羽趨以采齊行以

肆夏

登堂之樂節

仲尼燕居大饗有四焉苟知此矣雖在鉞敵之

中事之聖人也兩君相見揖讓而入門入門而縣興揖讓而升

堂升堂而樂闋

大饗謂饗諸侯來朝者也四者謂金再作升歌清廟下管象也縣興金作也金再作者獻主君

又作也 入門而金作示情也 賓主人各以情相示也 金性內明象人情也

升歌清廟示

德也下而管象示事也是故古之君子不必親相與言也以禮

樂相示而已 左氏傳成公十一年晉卻至如楚聘再滋盟楚

子享之子反相為地室而懸焉

縣鐘也

金奏作於下

等鐘而奏樂

驚而

走出子反曰日云莫矣寡君須矣吾子其入也賓曰君不忘先

君之好施及臣下貺之以大禮重之以備樂如天之福兩君相

見下臣不敢

言此兩君相見之樂

世之治也諸侯聞於天子之事則相朝

也於是乎有享宴之禮享以訓其儉宴以示慈惠其儉以行禮

而慈惠以布政政以禮成民是以息 襄公四年穆叔如晉報

知武子之聘也晉侯享之金奏肆夏之三不拜

肆夏樂曲名周禮以鐘鼓奏九

夏其二曰肆夏一名樂三曰韶夏一名過韓獻子使行人子員

四曰納夏一名樂蓋肆鐘而奏此三夏曲問之對曰三夏天子所以享元侯也使臣弗敢與聞國語魯

語下叔孫穆子聘於晉晉悼公饗之樂及鹿鳴之三而後拜樂

三晉侯使行人問焉對曰寡君使豹來繼先君之好君以諸侯

之故既使臣以大禮夫先樂金奏肆夏繁遏渠天子所以享元

侯也金奏以金奏樂也肆夏一名樂韶夏一名過納夏一名樂

此三夏曲也禮有九夏周禮鐘師掌以鐘鼓奏九夏元侯

收伯也鄭司農云九夏皆篇名頌之類載在樂章中樂崩亦從而亡是以頌不能具也夫歌文王大明緜

則兩君相見之樂也皆昭令德以合好也皆非使臣之所敢聞

也臣以為肄業及之故不敢拜漢書禮樂志皇帝入廟門奏

永至以為行步之節猶古采薺肆夏也劉德曰歌樂在逸詩

案金奏肆夏繁過渠皆頌類為天子樂春秋內外傳言三夏

天子所以享元侯若兩君相見則歌文王大明縣大司樂王

禮記集說卷一百一十五

出入奏王夏皆樂章名奏肆夏而統乎王此其用樂之正也

禮器大饗其王事與各以其國之所有諸侯助祭者出歌肆

夏以送之此天子於諸侯用肆夏之明文與禮經春秋傳並

合鄭注改為陟夏非也燕禮若與樂納賓則賓及庭奏肆夏

賓拜酒主人荅拜而樂闋公拜受爵而奏肆夏公卒爵主人

升受爵以下而樂闋注謂卿大夫有王事之勞則奏此樂明

事繫乎天子也至諸侯相朝亦用肆夏所謂禮盛者可以進

取也故郊特牲賓入大門而奏肆夏仲尼燕居大饗有四兩

君相見揖讓而入門入門而縣興揖讓而升堂升堂而樂闋
此皆據諸侯言之郊特牲大夫之奏肆夏由趙文子始注以
為僭諸侯明諸侯得用肆夏大夫不得自用肆夏矣卻至晉
大夫楚子享之而縣鐘鼓金奏作於地室故驚而反走辭以
備樂為兩君相見下臣不敢諸侯相朝則有享宴之禮可用
此樂也春秋時卿大夫於禮經最熟故言必有典動與古合
一釋頌有羽籥干舞戚

周禮地官舞師掌教兵舞帥而舞山川之祭祀教帔舞帥而舞
社稷之祭祀教羽舞帥而舞四方之祭祀教皇舞帥而舞旱暵
之事凡野舞則皆教之凡小祭祀則不興舞 春官鼙師下士

二人府一人舞者十有六人徒四十人 旄人下士四人舞者

衆寡無數府二人史二人胥二人徒二十人

旄人牛尾舞者所持以指麾

籥師中士四人府二人史二人胥二人徒二十人

籥舞者所吹春秋宣八年

壬午猶繹萬入去籥傳曰去其有聲者廢其無聲者詩云左手執籥右手秉翟

大司樂以樂舞教

國子舞雲門大卷大成大磬大夏大濩大武

此周所以存六代之樂黃帝曰雲門

大卷大成咸池堯樂也大磬舜樂也大夏禹樂也大濩湯樂也大武武王樂也以六律六同五聲八音

六舞大合樂以致鬼神示以和邦國以諧萬民以安賓客以說

遠人以作動物

大合樂者謂編作六代之樂以冬至作之致天神人以作動物神人鬼以夏日至作之致地祇物鬼動物羽蟲

之屬虞書云夔曰鴈擊鳴球搏拊琴瑟以詠祖考來格虞賓在位羣后德讓下管鼗鼓合止祝敔笙庸以間鳥獸賡工蕭韶九成鳳凰來儀夔又曰於擊石拊石百獸率舞應九奏應效乃奏黃鐘歌大呂舞雲

門以祀天神乃奏大簇歌應鐘舞咸池以祭地示乃奏姑洗歌

南呂舞九磬以祀四望乃奏蕤賓歌函鐘舞大夏以祭山川乃

奏夷則歌小呂舞大濩以享先妣乃奏無射歌夾鐘舞大武以

享先祖九磬讀為大韶字之誤也凡六樂者文之以五聲播之以八音帥國

子而舞當用舞者帥以往及射合奏騶虞詔諸侯以弓矢舞舞謂執弓矢揖讓

進退之儀釋曰此諸侯來朝將助祭預天子樂師掌國學之

政以教國子小舞謂以年幼少時教之舞內則曰十凡舞有帔

舞有羽舞有皇舞有旄舞有干舞有人舞釋曰云十三舞勺勺

大武也言能酌先祖之道以養天下也云成章舞象者即周頌

序云維清奏象舞也云二十舞大夏者人年二十加冠成人而

舞大夏大夏夏禹之舞雖舉大夏其實雲門也下六舞皆學以

其自夏已上揖讓而得天下自夏以下征伐征誅而得天下夏

為文武中
故特舉之

大胥春入學舍采合舞秋頒學合聲以六樂之會

正舞位以序出入舞者 小胥巡舞列而撻其怠慢者 銖師

掌教銖樂祭祀則帥其屬而舞之大饗亦如之 旄人掌教舞

散樂舞夷樂凡四方之以舞仕者屬焉凡祭祀賓客舞其燕樂

籥師掌教國子舞羽敔籥籥祭祀則鼓羽籥之舞賓客饗食則

亦如之

司干掌舞器

舞器羽籥之屬

祭祀舞者既陳則授舞器既舞

則受之

受取

賓饗亦如之

儀禮燕禮記若舞則勺

勺頌篇告成太武之

樂歌也則其詩曰於籥王師遵養時晦又曰賓維爾公允師既

合以美王侯勸有功也釋曰宣八年公羊傳云壬午猶繹萬入

去籥傳曰萬者何干舞也禮記文王世子春夏學干戈冬學

謂秉干舞以奏勺詩也

羽籥皆於東序干有正戈白子戟也干戈萬舞象舞也用動作之時學之羽籥籥舞象文也用安靜之時學之

詩云左手執簫右手秉柱小樂正學干大胥贊之簫師學戈簫師承贊之郊

郊特牲諸侯之宮縣而祭以白牡擊玉磬朱干設錫冕而舞

大武乘大路諸侯之僭禮也

言此皆天子之禮也干盾也錫傳其背如龜也武萬舞也

內

則十有三年學樂誦詩舞勺成童舞象學射御

先學勺後學象文武之次也成

童十五以上

二十而冠始學禮可以衣帛舞大夏

大夏樂之文武備者也

明

堂位季夏六月以禘禮祀周公於太廟升歌清廟下管象朱干

玉戚冕而舞大武皮弁素積褐而舞大夏

朱干赤大盾也戚斧也大武周舞也大夏

夏舞

昧東夷之樂也任南蠻之樂也納夷蠻之樂於太廟言廣

魯於天下也

周詩昧師掌教昧樂詩曰以雅以南以樂不愆廣大也

樂記千戚羽旄謂

之樂

千盾也戚斧也武舞所執也羽翟羽也旄旄牛尾也文舞所執周禮舞師樂師掌教舞有兵舞有干舞有羽舞有旄

舞詩曰左手執籥右手執鼗故鐘鼓管磬羽籥干戚樂之器也屈伸俯仰綴

兆舒疾樂之文也綴謂節舞者之位也兆其外營域也故聽其雅頌之聲志意得

廣焉執其干戚習其俯仰詘伸容貌得莊焉行其綴兆要其節

奏行列得正焉進退得齊焉綴表也所以表行列也詩云荷戈與綴兆域也舞者進退所至也要

猶會也祭統夫大嘗禘升歌清廟下而管象朱干玉戚以舞大

武八佾以舞大夏此天子之樂也康周公所以賜魯也清廟頌文王之

詩也管象吹管而舞武象之樂也朱干赤盾戚斧也此武象之舞所執也佾猶列也大夏禹樂文舞也執羽籥文舞之舞皆八

列五言之耳仲尼燕居下管象武夏籥序興下謂堂下也象武武舞也夏籥

文舞也序更也堂下吹升歌清廟示德也下而管象示事也相

以事也康武武王之大事也春秋左氏傳襄公十年宋公享晉侯於楚丘

請以桑林

桑林假天子之樂名

荀彘辭荀偃士句曰諸侯宋魯於是觀禮

宋王者後魯以周公故皆用天子禮樂故可觀

魯有禘樂賓祭用之

禘三年大祭則作四代之樂別祭羣

公則用宋以桑林享君不亦可乎

言具天子樂也

舞師題以旌夏

師樂也

旌夏大旌也題識也以大旌表識其行列

晉侯懼而退入于房

旌夏非常卒見之人心偶有所畏

去

旌卒享而還

正義曰皇甫謐云假樂一名桑林以桑林為大龍別名

襄公二十九年吳

公子札來聘請觀於周樂見舞象箛南籥者

象箛舞所執南籥以箛舞也皆文王

之樂曰姜哉猶有憾

姜者姜其容也文王恨不及已致太平

見舞大武者

武王

哉周之盛也其若此乎見舞韶箛者

假湯

曰聖人之知也而猶

有慙德聖人之難見也見舞大夏者

禹之

曰美哉勤而不得非

禹其誰能修之見舞韶箛者

舜

曰德至矣哉大矣如天之無不

情也如地之無不載也雖甚威德其段以加於此矣觀止矣若

有他樂吾不敢請已也
魯用四代之樂故及韶而季子知其終

去無道杜云皆文王之樂則象前與南各是一舞南篇既是

文舞則象前當是武舞也詩云維清維清奏象舞則此象前之舞劉

炫云知是文王樂者詩云維清維清奏象舞則此象前之舞劉

王之典此象樂之所舞故知是文樂也 公羊傳隱公五年九

月考仲子之宮初獻六羽何以書譏始僭諸公也天子八佾諸

公六諸侯四不言六佾者言佾則千舞在其中明婦人無武事

宣公八年夏六月公子遂如齊至黃乃復卒已有事於太廟

仲遂卒于垂壬午猶繹萬入去籥萬者何千舞也千謂植也能

而不使害入故聖人皆之以為武樂萬者其篇 籥者何籥舞也

名武王以萬人服天下民樂之故名之云爾

籥所吹以節舞也吹 其言萬入去籥何去其有聲者廢其無聲

者 昭公二十有五年齊侯唁公于野井子家駒曰諸侯僭於

天子大夫僭於諸侯久矣設兩觀乘大路朱干玉戚以舞大夏

八佾以舞大武此皆天子之禮也

大夏夏樂也周所以舞夏樂者王者始起未制作之時取

先王之樂與已同者假以風化天下天下大同乃自作樂取夏樂者與俱文也王者舞六樂於宗廟之中舞先王之樂明有法

也舞已之樂明有則也舞四夷之樂大德廣及之也

穀梁傳隱公五年九月考仲子之

宮初獻六羽穀梁子曰舞夏天子八佾諸公六佾諸侯四佾初

獻六羽始僭樂矣

夏大也大謂大雉大雉翟雉案舞夏者蓋謂舞大夏注誤耳

宣公八年

萬入去籥以其為之變譏之也

萬舞名籥管也內舞去籥惡其聲聞此為卿變為常禮是知其

不可而為之

案大司樂所掌六代之樂皆頌也以周之大武知之大獲亦

商頌篇名正考父按商頌十二篇大蕷當在其中至孔子時

已亡而桑林之樂猶存於宋晉荀偃士臼許宋以桑林享晉

君晉侯駟見旌夏而懼是頌有舞也周禮樂師

左傳舞師題以旌夏杜注

師樂師本周禮則傳文舞師舞字衍文也

掌國學之政以教國子小舞有帔舞有

羽舞有皇舞有旄舞有干舞有人舞析羽為旌旌夏羽舞也

周備四代之樂大韶之音大夏之舞春秋猶存若周頌之舞

見於經傳者則維清武勺三篇而已周禮大司樂及射令奏

騶虞詔諸侯以弓矢舞此射奏國風騶虞之詩舞弓矢為射

節非頌故不用干戚也

一釋舞容有象

詩序維清奏象舞也

象舞象用兵時刺伐之舞武王制焉曲名曰服虔云象文王之樂舞象也

言天下樂則去無通

武奏大武也

大武周公作樂所為舞也

酌告成大武也言能

酌先祖之道以養天下也

周公居攝六年制禮作樂歸政成王乃後祭於廟而奏之其始告成之而

已

禮記樂記樂象第六樂者心之動也聲者樂之象也文采

節奏聲之飾也君子動其本樂其象然後治其飾是故先鼓以

警戒三步以見方再始以著往復亂以飾歸奮疾而不拔極幽

而不隱獨樂其志不厭其道備舉其道不私其欲

文采樂之威儀也先鼓將

奏樂先聲鼓以警戒衆也三步謂將舞必先三舉足以見其舞

之漸也再始以著往武王除喪至盟津之上紂未可伐還歸二

年乃遂伐之武舞再更始以明伐時再往也復亂以飭歸是故

謂鳴鑣而退明以整歸也奮疾謂舞者也極幽謂歌者也情見而義立樂終而德尊君子以好善小人以聽過故曰生民

之道樂為大焉 賓牟賈第九賓牟賈侍坐於孔子孔子與之

言及樂曰武之備戒之已久何也對曰病不得其衆也武謂周舞也備

戒擊鼓警衆為憂憂其難也以不咏歎之淫液之何也對曰恐不逮事

也咏嘆淫佚歌逸之也發揚蹈厲之已早何也對曰及時事也時至

武事當武坐致右憲左何也對曰非武坐也言武之事無坐也至謂膝至地也憲

讀為軒聲聲淫及商何也對曰非武音也言武歌在正其軍不

義為貪子曰若非武音則何音也對曰有司失其傳也若非有

司失其傳則武王之志荒矣有司典樂者也子曰唯丘之聞諸萇弘亦

若吾子之言是也賓牟賈起免席而請曰夫武之備戒之已久

則既闢命矣敢問遲之遲而又久何也遲之遲謂久立于綴子曰居吾語

汝夫樂者象成者也摠千而山立武王之事也發揚蹈厲大公

之志也武亂皆坐周召之治也成謂亂成之事也發揚蹈厲所以象威武時也武舞象戰闕也

亂謂失行列也失行列則皆坐象周公召公以文止武也且夫武始而北出再成而滅商三

成而南四成而南國是疆五成而分周公左召公右六成復綴

以崇成猶奏也每奏一曲一終為一成始奏象觀兵盟津時也再奏象克殷時也三奏象克殷有餘力而反也四奏象南方荆蠻之國侵畔者服也五奏象周公召公分職而治也六奏

象兵還振旅也復綴反位止也索充也凡六奏以充武樂也天子夾振之而馬伐威威於中國也夾振之者王與大將夾舞者振鐸以為節也駟當作

四聲之誤也武舞戰象也每奏四伐一擊一刺為一伐牧誓曰今日之事不過四伐五伐分夾而進事蚤濟也

分猶部曲也事猶為也濟成也舞者各有部久立於綴以待諸曲之列又夾振之者象用兵務於早成也

侯之至也象武王伐紂待諸侯也招本第二十一昭頌第二十二按頌古容

侯之至也象武王伐紂待諸侯也招本第二十一昭頌第二十二按頌古容

案魯備四代之樂季札觀其舞必曰美哉大哉德至矣哉杜
元凱以為美其容是也據樂象篇言大武曰先鼓以警戒三
步以見方再始以著往復亂以飾歸又賓牟賈篇言摠干山
立發揚蹈厲武亂皆坐及六成等象知樂舞之容所以形古
帝王文德武功逐科衍出猶令伶人演戲口歌而手舞足蹈
也詩序維清注云象用兵時刺伐之舞酌頌等篇可類推然
則大夏之舞必象禹敷文德之形大濩之舞必象湯以寬治
民而除邪之容舞必有象於三頌可必也

一釋國風小大雅但有笙歌瑟管而無羽籥干戚

儀禮鄉飲酒禮工四人二瑟

四人大夫制也二瑟二
人鼓瑟則二人歌也

工歌鹿

鳴四牡皇皇者華

三者皆小雅篇也

笙入堂下磬南北而立樂南陔白

華華黍

笙吹笙者也以笙吹此詩以為樂也南陔白華華黍小雅篇也今亡其義未聞昔周之興也周公制禮作樂采

時世之詩以為樂歌所以通情相風切也其有此篇明矣後世
衰微幽厲尤甚禮樂之書稍廢棄孔子曰吾自衛反魯然後
樂正雅頌各得其所謂當時在者而復重難亂者也惡能存其
亡者乎且正考父校商之名頌十二篇於周太師歸以紀其先

王至孔子二百年之間
五篇而已此其信也

間歌魚麗笙由庚歌南有嘉魚笙崇仁

歌南山有臺笙由儀

間代也謂一歌則一吹
六者皆小雅篇也

乃合樂周南關雎

葛覃卷耳召南鵲巢采芣苢采芣苢

合樂謂歌樂與衆聲俱作此六
篇者其教之原也故國君與其

臣下及四方之賓
純用之合樂也

無箏樂

熱樂亦無數或間
或合盡微而止也

鄉射禮工四人

二瑟瑟先乃合樂周南關雎葛覃卷耳召南鵲巢采芣苢采芣苢

不

不笙不聞志在射畧於樂也

燕禮工歌鹿鳴四牡皇者華笙入立於縣

中奏南陔白華華黍乃間歌魚麗笙由庚歌南有嘉魚笙崇丘

歌南山有臺笙由儀遂歌鄉樂周南關雎萬覃卷耳召南鵲巢

采繁采蘋太師告樂正曰正歌備

正歌者升歌及笙各三終間歌三終合樂三終為一備備

亦成也

記升歌鹿鳴下管新宮笙入三成

新宮小雅逸篇也

遂合鄉樂

鄉樂周南召南六篇言遂者不間也

有房中之樂

弦歌周南召南之詩而不用鐘磬之節也謂之房中者后夫人

之所諷誦以事其君子

大射儀乃歌鹿鳴三終

不歌四牡皇華

乃管新宮三終

管謂吹簫以攝新宮之樂其篇七其義未聞遂笙簫之為樂正命大師曰奏雅首間若一首

逸詩射義所載曾孫侯氏是也

禮記學記宵雅肄三官其始

間一若者謂其聲之疏數重節也

也宵之言小也肄習也習小雅之三謂鹿鳴四牡皇者華也此皆君臣宴樂相勞苦之時為始學者習之所以勸之以官

且取上下
相和厚

樂記子贛見師乙而問焉曰賜聞升歌各有宜也

如賜者宜何歌也師乙曰乙賤工也何足以問所宜請誦其所

聞而吾子自執焉寬而靜柔而正者宜歌頌廣大而靜疏達而

信者宜歌大雅恭儉而好禮者宜歌小雅正直而靜廉而謙者

宜歌風肆直而慈愛者宜歌商溫良而能斷者宜歌齊鄉飲

酒義工入升歌三終主人獻之笙入三終主人獻之間歌三終

合樂三終工告樂備遂出

工謂樂正也樂正既告備而降
言遂出者自此至去不復升也

春

秋左氏傳襄公四年穆叔如晉報知武子之聘也晉侯享之金

奏肆夏之三不拜工歌文王之三又不拜歌鹿鳴之三三拜韓

獻子使行人子員問之對曰三夏天子所以享元侯也使臣弗

敢與聞文王兩君相見之樂也臣不敢及鹿鳴君所以嘉寡君也敢不拜嘉四牡君所以勞使臣也敢不重拜皇者華君敎使臣曰必諮於周臣聞之訪問於善為咨咨親為詢咨禮為度咨事為諏咨難為謀臣獲五善敢不重拜 襄公二十九年吳公子札來聘請觀於周樂使工為之歌周南召南為之歌邶鄘衛為之歌王為之歌鄭為之歌齊為之歌豳為之歌秦為之歌魏為之歌陳自鄆以下無譏焉為之歌小雅為之歌大雅為之歌頌 國語魯語叔孫穆子聘于晉晉悼公饗之樂及鹿鳴之三而後拜樂三晉侯使行人問焉對曰寡君使豹來繼先君之好君以諸侯之故貺使臣以大禮夫先樂金奏肆夏繁遏渠天

予所以饗元侯也夫歌文王大明繇則兩君相見之樂也文王大明

縣大雅之首文王之三也三篇皆美文王武王有威德天所輔助其微應符驗著見于天乃天命非人力也周公欲昭先王之

德於天下故兩君相見得以為樂也皆昭令德以合好也皆非使臣之所敢聞也

臣以為肄業及之故不敢拜今伶蕭詠歌及鹿鳴之三伶人樂官也

樂器編管為之言樂人以蕭作此三篇之聲與歌者相應也詩蕭管備舉君之所以貺使臣臣敢不

拜既夫鹿鳴君之所以嘉先君之好也漢書禮樂志有房中

祠樂高祖唐山夫人所作也服虔曰高帝姬也韋昭曰唐山姓也周有房中樂至

秦名曰壽人

案國風小大雅詩樂見周禮儀禮禮記及春秋內外傳者曰

歌曰奏曰瑟曰笙曰管曰工歌曰伶蕭絕無言舞者是可證

舞之專屬三頌矣此本儀徵阮伯元侍郎說見研經室文集
庸更詳考之經傳為之釋如此侍郎謂國風小大正如今蘇
州十番班子及彈南詞瞎子但坐而歌也頌必有舞如今崑
腔戲文必做出樣子頌容水樣声相轉也庸更詳考之經傳
為之釋如此